

# **Epidicus**

Titus Maccius Plautus

## PERSONAE

EPIDICVS SERVVS  
THESPRIO SERVVS  
STRATIPPOCLES ADVLESCENS  
CHAERIBVLVS ADVLESCENS  
PERIPHANES SENEX  
APOECIDES SENEX  
FIDICINA  
MILES  
PHILIPPA MVLIER  
ACROPOLISTIS FIDICINA  
DANISTA  
TELESTIS VIRGO

## ARGVMENTVM

Emit fidicinam, filiam credens, senex  
Persuasu servi, atque conductam  
Iterum pro amica ei subiecit filii.  
Dat erili argentum. eo sororem destinat  
Imprudens iuvenis. compressae ac militis  
Cognoscit opera sibi senex os sublitum --  
Vt ille amicam, haec quaerebat filiam --  
Sed inventa gnata servolum emittit manu.

## ACTVS I

I.i

EPIDICVS Heus, adulescens. THESPRIO Quis properantem me  
reprehendit pallio?

EP. Familiaris. TH. Fateor, nam odio es nimium familiariter.

EP. Respice vero, THESPRIO. TH. Oh,

Epidicumne ego conspikor?

EP. Satis recte oculis uteris. 5

TH. Salve. EP. Di dent quae velis.

venire salvom gaudeo. TH. Quid ceterum? EP. Quod eo adsolet:

cena tibi dabitur. TH. Spondeo. EP. Quid? TH. Me accepturum, si dabis.

EP. Quid tu agis? ut vales? exemplum adesse intellego. euge,  
corpulentior videre atque habitior. TH. Huic gratia. 10

EP. Quam quidem te iam diu

perdidisse oportuit. 11a

T. Minus iam furtificus sum quam antehac. E. Quid ita? T. Rapio propalam.

EP. Di immortales te infelicient, ut tu es gradibus grandibus.

nam ut apud portum te conspexi, curriculo ocepi sequi:

vix adipiscendi potestas modo fuit. TH. Scurra es. EP. Scio 15  
 te esse equidem hominem militarem. TH. Audacter quam vis dicito.  
 quid ais? perpetuen valuisti? EP. Varie. TH. Qui varie valent,  
 capreaginum hominum non placet mihi neque pantherinum genus.  
 EP. Quid tibi vis dicam nisi quod est? ut illae res? responde. TH. Probe.  
 EP. Quid erilis noster filius? TH. Valet pugilice atque athleticce. 20  
 EP. Voluptabilem mihi nuntium tuo adventu adportas, THESPRIO.  
 sed ubi is? TH. Advenit simul. EP. Vbi is ergo est? nisi si in vidulo  
 aut si in mellina attulisti. TH. Di te perdant. EP. Te volo --  
 percontari: operam da, opera reddetur tibi.  
 TH. Ius dicis. EP. Me decet. TH. Iam tu autem nobis praeturam geris? 25  
 EP. Quem dices digniorem esse hominem hodie Athenis alterum?  
 TH. At unum a praetura tua,  
 Epidice, abest. EP. Quidnam? TH. Scies:  
 lictores duo, duo ulmei  
 fasces virgarum. EP. Vae tibi.  
 sed quid ais? TH. Quid rogas? EP. Vbi arma sunt Stratippocli?  
 T. Pol illa ad hostis transfugerunt. E. Armane? T. Atque equidem cito. 30  
 EP. Serione dicis tu?  
 TH. Serio, inquam: hostes habent.  
 EP. Edepol facinus improbum. TH. At iam ante alii fecerunt idem.  
 erit illi illa res honori. EP. Qui? TH. Quia ante aliis fuit.  
 Mulciber, credo, arma fecit quae habuit Stratippocles:  
 travolaverunt ad hostis. EP. Tum ille prognatus Theti 35  
 sine perdat: alia apportabunt ei Nerei filiae.  
 id modo videndum est, ut materies suppetat scutariis,  
 si in singulis stipendiis is ad hostis exuvias dabit.  
 TH. Supersede istis rebus iam. EP. Tu ipse, ubi lubet, finem face.  
 TH. Desiste percontarier. EP. Loquere ipse: ubi is Stratippocles? 40  
 TH. Est causa qua causa simul mecum ire veritust. EP. Quidnam id est?  
 TH. Patrem videre se nevolt etiam nunc. EP. Quapropter? TH. Scies.  
 quia forma lepida et liberali captivam adolescentulam  
 de praeda mercatust. EP. Quid ego ex te audio? TH. Hoc quod fabulor.  
 EP. Cur eam emit? TH. Animi causa. EP. Quot illic homo animos habet? 45  
 nam certo, prius quam hinc ad legionem abiit domo,  
 ipse mandavit mi, ab lenone ut fidicina,  
 quam amabat, emeretur sibi. id ei impetratum reddidi.  
 TH. Vtcumque in alto ventust, Epidice, exim velum vortitur.  
 EP. Vae misero mihi, male perdidit me. TH. Quid istuc? quidnam est? 50  
 EP. Quid istanc quam emit, quanti eam emit? TH. Vili. EP. Haud istuc te rogo.  
 TH. Quid igitur? EP. Quot minis? TH. Tot -- quadraginta minis.  
 id adeo argentum ab danista apud Thebas sumpsit faenore,  
 in dies minasque argenti singulas nummis. EP. Papae.  
 TH. Et is danista advenit una cum eo, qui argentum petit. 55  
 EP. Di immortales, ut ego interii basilice. TH. Quid iam? aut quid est,  
 Epidice? EP. Perdidit me. TH. Quis? EP. Ille qui arma perdidit.  
 TH. Nam quid ita? EP. Quia cottidie ipse ad me ab legione epistulas  
 mittebat -- sed taceam optimum est,  
 plus scire satiust quam loqui servom hominem. ea sapientia est. 60

TH. Nescio edepol quid tu timidus es, trepidas, Epidice, ita voltum tuom~  
 videor videre commeruisse hic me absente in te aliquid mali.  
 EP. Potin ut molestus ne sies? TH. Abeo. EP. Asta, abire hinc non sinam.  
 TH. Quid nunc me retines? EP. Amatne istam quam emit de praeda? TH. Rogas?  
 deperit. EP. Detegetur corium de tergo meo. ~ 65  
 TH. Plusque amat quam te umquam amavit. EP. Iuppiter te perduit.  
 TH. Mitte nunciam, nam ille me vetuit domum  
 venire, ad Chaeribulum iussit huc in proximum;  
 ibi manere iussit, eo venturust ipsus. EP. Quid ita? TH. Dicam:  
 quia patrem prius convenire se non volt neque conspicari, 70  
 quam id argentum, quod debetur pro illa, denumeraverit.  
 EP. Eu edepol res turbulentas. TH. Mitte me ut eam nunciam.  
 EP. Haecine ubi scibit senex,  
 puppis pereunda est probe.  
 TH. Quid istuc ad me attinet, 75  
 quo tu intereas modo?  
 EP. Quia perire solus nolo, te cupio perire mecum,  
 benevolens cum benevolente. TH. Abi in malam rem maxumam a me  
 cum istac condicione. EP. I sane, siquidem festinas magis.  
 TH. Numquam hominem quemquam conveni, unde abierim lubentius. 80  
 EP. Illic hinc abiit. solus nunc es. quo in loco haec res sit vides,  
 Epidice: nisi quid tibi in tete auxili est, absumptus es.  
 tantae in te impendent ruinae: nisi suffulcis firmiter,  
 non potes subsistere, itaque in te inruont montes mali.  
 neque ego nunc quo modo 85  
 me expeditum ex impedito faciam, consilium placet.  
 ego miser perpuli  
 meis dolis senem, ut censeret suam sese emere filiam:  
 is suo filio  
 fidicinam emit, quam ipse amat, quam abiens mandavit mihi. 90  
 si sibi nunc alteram  
 ab legione adduxit animi causa, corium perdidit. 91a  
 nam ubi senex senserit  
 sibi data esse verba, virgis dorsum despoliet meum.  
 at enim tu praecave.  
 at enim -- bat enim, nihil est istuc. plane hoc corruptumst caput. 95  
 nequam homo es, Epidice.  
 qui lubidost male loqui?  
 quia tu tete deseris.  
 quid faciam? men rogas?  
 tu quidem antehac aliis solebas dare consilia mutua.  
 aliquid aliqua reperiundumst. sed ego cesso ire obviam 100  
 adulescenti, ut quid negoti sit sciam. atque ipse illic est.  
 tristis est. cum Chaeribulo incedit aequali suo.  
 huc concedam, orationem unde horum placide persequar.

meorum maerorum atque amorum summam edictavi tibi. 105  
CHAERIBVLVS Praeter aetatem et virtutem stultus es, Stratippocles.  
idne pudet te, quia captivam genere prognatam bono  
de praeda es mercatus? quis erit, vitio qui id vortat tibi?  
STR. Qui invident omnes inimicos mi illoc facto repperi;  
at pudicitiae eius numquam nec vim nec vitium attuli. 110  
CHAER. Iam istoc probior [es] meo quidem animo, cum in amore temperes.  
STR. Nihil agit qui diffidentem verbis solatur suis;  
is est amicus, qui in re dubia re iuvat, ubi rest opus.  
CHAER. Quid tibi me vis facere? STR. Argenti dare quadraginta minas,  
quod danistae detur, unde ego illud sumpsi faenore. 115  
CHAER. Si hercle haberem \*\*\* STR. Nam quid te igitur retulit  
beneficum esse oratione, si ad rem auxilium emortuom est?  
CHAER. Quin edepol egomet clamore differor, difflagitor.  
STR. Malim istius modi mihi amicos furno mersos quam foro.  
sed operam Epidici nunc me emere pretio pretioso velim. 120  
quem quidem ego hominem irrigatum plagis pistori dabo,  
nisi hodie prius comparassit mihi quadraginta minas,  
quam argenti fuero elocutus ei postremam syllabam.  
EP. Salva res est: bene promittit, spero servabit fidem.  
sine meo sumptu paratae iam sunt scapulis symbolae. 125  
aggrediar hominem. advenientem peregre erum suom Stratippoclem  
impertit salute servos Epidicus. STR. Vbi is est? EP. Adest.  
salvom huc advenisse -- STR. Tam tibi istuc credo quam mihi.  
EP. Benene usque valuisti? STR. A morbo valui, ab animo aeger fui.  
EP. Quod ad me attinuit, ego curavi: quod mandavisti mihi 130  
impetratum est, empta ancilla, quod tute ad me litteras  
missiculabas. STR. Perdidisti omnem operam. EP. Nam qui perdidit?  
STR. Quia meo neque cara est cordi neque placet. EP. Quid retulit  
mihi tanto opere te mandare et mittere ad me epistulas?  
STR. Illam amabam olim, nunc iam alia cura impendet pectori. 135  
EP. Hercle miserum est ingratum esse homini id quod facias bene.  
ego quod bene feci male feci, quia amor mutavit locum.  
STR. Desipiebam mentis, cum illa scripta mittebam tibi.  
EP. Men piacularum oportet fieri ob stultitiam tuam,  
ut meum tergum tuae stultitiae subdas succidaneum? 140  
STR. Quid istic? verba facimus. huic homini opust quadraginta minis  
celeriter calidis, danistae quas resolvat, et cito.  
EP. Dic modo unde auferre me vis. a quo trapezita peto?  
STR. Vnde libet. nam ni ante solem occasum elo \*  
meam domum ne inbitas: tu te in pistrinum 145  
EP. Facile tu istuc sine periclo et cura, corde libero  
fabulare; novi ego nostros: mihi dolet cum ego vapulo.  
STR. Quid tu nunc? patierin ut ego me interimam? EP. Ne feceris.  
ego istuc accedam periculum potius atque audaciam.  
STR. Nunc places, nunc ego te laudo. EP. Patiar ego istuc quod lubet. 150  
STR. Quid illa fiet fidicina igitur? EP. Aliqua res reperibitur,  
aliqua ope exsolvar, extricabor aliqua. STR. Plenus consili es.  
novi ego te. EP. Est Euboicus miles locuples, multo auro potens,

qui ubi tibi istam emptam esse scibit atque hanc adductam alteram,  
continuo te orabit ultro ut illam tramittas sibi. 155  
sed ubi illa est quam tu adduxisti tecum? STR. Iam faxo hic erit.  
CH. Quid hic nunc agimus? ST. Eamus intro huc ad te, ut hunc hodie diem  
luculentum habeamus. -- EP. Ite intro, ego de re argentaria  
iam senatum convocabo in corde consiliarium,  
quoi potissimum indicatur bellum unde argentum auferam. 160  
Epidice, vide quid agas, ita res subito haec obiectast tibi;  
non enim nunc tibi dormitandi neque cunctandi copia est:  
adeundumst. senem oppugnare certumst consilium mihi.  
i abi intro atque adulescenti dic iam nostro erili filio,  
ne hinc foras ambulet neve usquam obviam veniat seni. 165

## ACTVS II

### II.i

APOECIDES Plerique homines, quos cum nil refert pudet,  
ubi pudendum est ibi eos deserit pudor,  
quom usus est ut pudeat.  
is adeo tu es. quid est quod pudendum siet,  
genere natam bono pauperem domum 170  
ducere te uxorem? 170a  
praesertim eam, qua ex tibi commemores hanc quae domist  
filiam prognatam.  
PERIPHANES Revereor filium. AP. At pol ego te credidi  
uxorem, quam tu extulisti, pudore exsequi,  
cuius quotiens sepulcrum vides, sacruficas 175  
ilico Orco hostiis, neque adeo iniuria,  
quia licitumst eam tibi vivendo vincere. PER. Oh,  
Hercules ego fui, dum illa mecum fuit;  
neque sexta aerumna acerbior Herculi, quam illa mihi obiectast.  
AP. Pulcra edepol dos pecuniast. PER. Quae quidem pol non maritast. 180

### II.ii

EPIDICVS St, tacete, habete animum bonum.  
liquido exeo foras auspicio, avi sinistra;  
acutum cultrum habeo, senis qui exenterem marsuppium.  
sed eccum ipsum ante aedis conspicor (cum) Apoecide 184-185  
qualis volo vetulos duo. 186  
iam ego me convortam in hirudinem atque eorum exsugebo sanguinem,  
senati qui columen cluent.  
\* \* \* 188a  
(AP.) continuo ut maritus fiat. PER. Laudo consilium tuom. 189-190  
nam ego illum audivi in amorem haerere apud nescio quam fidicinam, 191  
id ego excrucior. EP. Di hercle omnis me adiuvant augent amant:  
ipsi hi quidem mihi dant viam, quo pacto ab se argentum auferam.  
age nunciam orna te, Epidice, et palliolum in collum conice  
itaque adsimulato quasi per urbem totam hominem quaesiveris. 195

age, si quid agis. di immortales, utinam conveniam domi  
 Periphanem, per omnem urbem quem sum defessus quaerere:  
 per medicinas, per tonstrinas, in gymnasio atque in foro,  
 per myropolia et lanienas circumque argentarias.  
 rogitando sum raucus factus, paene in cursu concidi. 200  
 PER. Epidice. EP. Epidicum quis est qui revocat? PER. Ego sum, Periphanes.  
 AP. Et ego Apoecides sum. EP. Et ego quidem sum Epidicus. sed, ere, optuma  
 vos video opportunitate ambo advenire. PER. Quid rei est?  
 EP. Mane <dum>, sine respirem quaeso. PER. Immo adquiesce. EP. Animo malest.  
 A. Recipe anhelitum. P. Clementer, requiesce. E. Animum advortite. 205  
 a legione omnes remissi sunt domum Thebis. AP. <Quis hoc>  
 dicit factum? E. Ego ita factum esse dico. P. Scin tu istuc? E. Scio.  
 PER. Qui tu scis? EP. Quia ego ire vidi milites plenis viis;  
 arma referunt et iumenta ducunt. PER. Nimis factum bene.  
 EP. Tum captivorum quid ducunt secum! pueros, virgines, 210  
 binos, ternos, alius quinque; fit concursus per vias,  
 filios suos quisque visunt. PER. Hercle rem gestam bene.  
 EP. Tum meretricum numerus tantus, quantum in urbe omni fuit,  
 obviam ornatae occurrebant suis quaeque amatoribus,  
 eos captabant. id adeo qui maxime animum advorterim? 215  
 pleraeque eae sub vestimentis secum habebant retia.  
 quom ad portam venio, atque ego illam illi video praestolarier  
 et cum ea tibicinae ibant quattuor. PER. Quicum, Epidice?  
 EP. Cum illa quam tuos gnatus annos multos deamat, deperit,  
 ubi fidemque remque seque teque properat perdere; 220  
 ea praestolabatur illum apud portam. PER. Viden veneficam?  
 EP. Sed vestita, aurata, ornata ut lepide, ut concinne, ut nove.  
 PER. Quid erat induta? an regillam induculam an mendiculam?  
 EP. Inpluviatam, ut istaec faciunt vestimentis nomina.  
 PER. Vtin inpluvium induta fuerit? EP. Quid istuc tam mirabile est? 225  
 quasi non fundis exornatae multae incedant per vias.  
 at tributus quom imperatus est, negant pendi potis:  
 illis quibus tributus maior penditur, pendi potest.  
 quid istae, quae vesti quotannis nomina inveniunt nova?  
 tunicam rallam, tunicam spissam, linteolum caesicium, 230  
 indusiatam, patagiatam, caltulam aut crocotulam,  
 subparum aut subnimum, ricam, basilicum aut exoticum,  
 cumatile aut plumatile, carinum aut cerinum -- gerrae maxumae.  
 cani quoque etiam ademptumst nomen. PER. Qui? EP. Vocant Laconicum.  
 haec vocabula auctiones subigunt ut faciant viros. 235  
 AP. Quin tu ut occepisti loquere? EP. Occepere aliae mulieres  
 duae post me sic fabulari inter sese -- ego abscessi sciens  
 paulum ab illis, dissimulabam earum operam sermoni dare;  
 nec satis exaudibam, nec sermonis fallebar tamen,  
 quae loquerentur. PER. Id lubidost scire. EP. Ibi illarum altera 240  
 dixit illi quicum ipsa ibat -- PER. Quid? EP. Tace ergo, ut audias  
 postquam illam sunt conspicatae, quam tuos gnatus deperit:  
 'quam facile et quam fortunate evenit illi, obsecro,  
 mulieri, quam liberare volt amator.' 'quisnam is est?'

inquit altera illi. ibi illa nominat Stratippoclem 245  
 Periphanai filium. PER. Perii hercle. quid ego ex te audio?  
 EP. Hoc quod actum est. egomet postquam id illas audivi loqui,  
 coepi rursus vorsum ad illas pauxillatim accedere,  
 quasi retruderet hominum me vis invitum. PER. Intellego.  
 EP. Ibi illa interrogavit illam: ' qui sis? quis id dixit tibi?' 250  
 ' quin hodiadlatae tabellae sunt ad eam a Stratippocle,  
 eum argentum sumpsisse apud Thebas ab danista faenore,  
 id paratum et sese ob eam rem id ferre. PER. Certo ego occidi.  
 EP. Haec sic aibat: sic audivisse ex eapse atque epistula.  
 PER. Quid ego nunc faciam? consilium a te expetesso, Apoecides. 255  
 AP. Reperiamus aliquid calidi conducibilis consili.  
 nam ille quidem aut iam hic aderit, credo hercle, aut iam adest. EP. Si aequom siet  
 me plus sapere quam vos, dederim vobis consilium catum,  
 quod laudetis, ut ego opino, uterque, PER. Ergo ubi id est, Epidice?  
 EP. Atque ad eam rem conducibile. AP. Quid istuc dubitas dicere? 260  
 EP. Vos priores esse oportet, nos posterius dicere,  
 qui plus sapitis. PER. Eia vero, age dic. EP. At deridebitis.  
 AP. Non edepol faciemus. EP. Immo, si placebit, utitor,  
 consilium si non placebit, reperitote rectius.  
 mihi istic nec seritur nec metitur, nisi ea quae tu vis volo. 265  
 PER. Gratiam habeo; fac participes nos tuae sapientiae.  
 EP. Continuo arbitretur uxor tuo gnato atque ut fidicinam  
 illam quam is volt liberare, quae illum corrumpit tibi,  
 ulciscare atque ita curetur, usque ad mortem ut serviat.  
 AP. Fieri oportet. PER. Facere cupio quidvis, dum id fiat modo. EP. Em, 270  
 nunc occasiost faciundi, prius quam in urbem advenerit,  
 sicut cras hic aderit, hodie non venit. PER. Qui scis? EP. Scio.  
 quia mihi alius dixit qui illinc venit, mane hic adfore.  
 PER. Quin tu eloquere, quid faciemus? EP. Sic faciundum censeo  
 quasi tu cupias liberare fidicinam animi gratia 275  
 quasique ames vehementer tu illam. P. Quam ad rem istuc refert? E. Rogas?  
 ut enim praestines argento, prius quam veniat filius,  
 atque ut eam te in libertatem dicas emere, PER. Intellego.  
 EP. Vbi erit empta, ut aliquo ex urbe amoveas; nisi quid est tua  
 secus sententia. PER. Immo docte. EP. Quid tua autem, Apoecides? 280  
 AP. Quid ego iam nisi te commentum nimis astute intellego?  
 EP. Iam <simul> igitur amota ei erit omnis consultatio  
 nuptiarum, ne gravetur quod velis. PER. Vive sapis,  
 et placet. EP. Tum tu igitur calide quidquid acturu's age.  
 PER. Rem hercle loquere. EP. Et repperi, haec te qui abscedat suspicio. 285  
 PER. Sine me scire. EP. Scibis, audi. AP. Sapit hic pleno pectore.  
 EP. Opus est homine qui illo argentum deferat pro fidicina;  
 nam te nolo neque opus factost. PER. Quid iam? EP. Ne te censeat  
 fili causa facere, PER. Docte. EP. Quo illum ab illa prohibeas:  
 ne qua ob eam suspicionem difficultas evenat. 290  
 PER. Quem hominem inveniemus ad eam rem utilem? EP. Hic erit optimus,  
 hic poterit cavere recte, iura qui et leges tenet.  
 PER. Epidico habeas gratiam. EP. Sed ego istuc faciam sedulo:



ego illum conveniam atque adducam hunc ad eum quoiast fidicina,  
atque argentum ego cum hoc feram. P. Quanti emi potest minimo? EP. Illane? 295  
ad quadraginta fortasse eam posse emi minimo minis.  
verum si plus dederis, referam, nihil in ea re captiost.  
atque id non decem occupatum tibi erit argentum dies.  
PER. Quidum? EP. Quia enim mulierem alius illam adulescens deperit,  
auro opulentus, magnus miles Rhodius, raptor hostium, 300  
gloriosus: is emet illam de te et dabit aurum lubens.  
face modo, est lucrum hic tibi amplum. P. Deos quidem oro. E. Impetras.  
AP. Quin tu is intro atque huic argentum promis? ego visam ad forum.  
Epidice, eo veni. EP. Ne abitas prius quam ego ad te venero.  
A. Vsque opperiar. P. Sequere tu intro. E. I, numera, nil ego te moror. 305

## II.iii

nullum esse opinor ego agrum in agro Attico  
aeque feracem quam hic est noster Periphanes:  
quin ex occluso atque obsignato armario  
decutio argenti tantum quantum mihi lubet.  
quod pol ego metuo si senex resciverit, 310  
ne ulmos parasitos faciat, quae usque attondeant.  
sed me una turbat res ratioque, Apoecidi  
quam ostendam fidicinam aliquam conducticiam.  
atque id quoque habeo: mane me iussit senex  
conducere aliquam fidicinam sibi huc domum, 315  
<quae>, dum rem dinam faceret, cantaret sibi;  
ea conducetur atque ei praemonstrabitur  
quo pacto fiat subdola adversus senem.  
ibo intro, argentum accipiam ab damno sene.

## ACTVS III

### III.i

STRATIPPOCLES Expectando exedor miser atque exenteror, 320  
quo modo mi Epidici blanda dicta evenant.  
nimis diu maceror: sitne quid necne sit,  
scire cupio. CHAERIBVLVS Per illam tibi copiam  
copiam parare aliam licet: scivi equidem in principio ilico  
nullam tibi esse in illo copiam. STR. Interii hercle ego. 325  
CHAER. Absurde facis qui angas te animi; si hercle ego illum semel prendero,  
numquam inridere nos illum inultum sinam servom hominem.  
CHAER. Quid illum facere vis, qui, tibi quoi divitiae domi maxumae sunt,  
is nummum nullum habes neque sodali tuo in te copias. 329-330  
CHAER. Si hercle habeam, pollicear lubens, verum aliquid aliqua aliquo modo 331  
alicunde ab aliqui aliqua tibi spes est fore meliorem fortunam.  
STR. Vae tibi, muricide homo. CHAER. Qui tibi lubet mihi male loqui?  
STR. Quippe tu mi aliquid aliquo modo alicunde ab aliquibus blatis  
quod nusquamst neque ego id inmitto in aures meas 335  
nec mihi plus adiumenti ~ades, quam ille qui numquam etiam natust.

III.ii

EPIDICVS Fecisti iam officium tuom, me meum nunc facere oportet.

per hanc curam quieto tibi licet esse -- hoc quidem iam periit:

ne quid tibi hinc in spem referas, oppido hoc pollinctum est;

crede modo mihi: sic ego ago, sic egerunt nostri. 340

pro di immortales, mihi hunc diem dedistis luculentum,

ut facilem atque impetrabilem! sed ego hinc migrare cesso,

ut importem in coloniam hunc <meo> auspicio commeatum?

mihi cesso, cum sto. sed quid hoc? ante aedis duo sodales,

erum et Chaeribulum, conspikor. quid hic agitis? accipe hoc sis. 345

STR. Quantum hic inest? EP. Quantum sat est, et plus satis: superfit.

decem minis plus attuli quam tu danistae debes.

dum tibi ego placeam atque obsequar, meum tergum flocci facio.

STR. Nam quid ita? EP. Quia ego tuom patrem faciam parenticidam.

STR. Quid istuc est verbi? EP. Nil moror vetera et volgata verba; 350

peratum ductarent: ego follitum ductitabo.

nam leno omne argentum abstulit pro fidicina -- ego resolvi,

manibus his denumeravi pater suam natam quam esse credit;

nunc iterum ut fallatur pater tibi que auxiliium apparetur

inveni: nam ita suasi seni atque hanc habui orationem 355

\* \* \* 355a

ut cum rediisses ne tibi eius copia esset. STR. Euge.

\* \* \* 356a

(EP.) Ea iam domist pro filia. STR. <Iam> teneo. EP. Nunc caurem

dedit mihi ad hanc rem Apoecidem, is apud forum manet me,

[quasi que amaret] caveat. STR. Haud male. EP. Iam ipse cautor captust.

ipse in meo collo tuos pater cruminam collocavit; 360

is adornat, adveniens domi extemplo ut maritus fias.

STR. Vno persuadebit modo, si illam, quae adducta est mecum,

mi adempsit Orcus. EP. Nunc ego hanc astutiam institui.

deveniam ad lenonem domum egomet solus, eum ego docebo,

si quid ad eum adveniam, ut sibi esse datum argentum dicat 365

pro fidicina, argenti minas se habere quinquaginta --

quippe ego qui nudiustertius meis manibus denumeravi

pro illa tua amica, quam pater suam filiam esse retur --

ibi leno sceleratum caput suom imprudens alligabit,

quasi pro illa argentum acceperit, quae tecum adducta nunc est. 370

CHAER. Vorsutior es quam rota figularis. EP. Iam ego parabo

aliquam dolosam fidicinam, nummo conducta quae sit,

quae se emptam simulet, quae senes duo docte ludificetur.

eam ducet simul Apoecides ad tuom patrem. STR. Vt parate.

EP. Eam permeditatam, meis dolis astutiisque onustam 375

mittam. sed nimis longum loquor, diu me estis demorati.

haec scitis iam ut futura sint. abeo. STR. Bene ambulato.

CHAER. Nimis doctus ille <est> ad male faciendum. STR. Me equidem certo

servavit consiliis suis. CHAER. Abeamus intro hinc ad me.

STR. Atque aliquanto lubentius quam abs te sum egressus intus; 380

virtute atque auspicio Epidici cum praeda in castra redeo.

### III.iii

PERIPHANES Non oris causa modo homines aequom fuit  
sibi habere speculum, ubi os contemplarent suom,  
sed qui perspicere possent cor sapientiae,  
[igitur perspicere ut possent cordis copiam] 385  
ubi id inspexissent, cogitarent postea,  
vitam ut vixissent olim in adolescentia.  
vel ego, qui dudum fili causa coeperam  
ego med excruciare animi, quasi quid filius  
meus deliquisset me erga aut quasi non plurima 390  
male facta mea essent solida in adolescentia.  
profecto deliramus interdum senes.  
[fuit conducibile hoc quidem mea sententia.]  
sed meus sodalis it cum praeda Apoecides.  
venire salvom mercatorem gaudeo. 395  
quid fit? APOECIDES Di deaeque te adjuvant. PER. Omen placet.  
AP. Quin omni omnes suppetunt res prospere.  
sed tu hanc iube sis intro abduci. PER. Heus, foras  
exite huc aliquis. duce istam intro mulierem.  
atque audin? SERVVS Quid vis? PER. Cave siris cum filia 400  
mea copulari hanc neque conspicere. iam tenes?  
in aediculam istanc sorsum concludi volo.  
divortunt mores virgini longe ac lupae.  
AP. Docte et sapienter dicis. ~ num nimis potest  
pudicitiam quisquam suae servare filiae. 405  
edepol ne istam temperi gnato tuo  
sumus praemercati. PER. Quid iam? AP. Quia dixit mihi  
iam dudum se alius tuom vidisse hic filium:  
hanc edepol rem apparabat. PER. Planum hercle hoc quidem est.  
AP. Ne tu habes servom graphicum et quantivis preti, 410  
non carust auro contra. ut ille fidicinam  
fecit <sese ut> nesciret esse emptam tibi!  
ita ridibundam atque hilaram huc adduxit simul.  
PER. Mirum hoc qui potuit fieri. AP. Te pro filio  
facturum dixit rem esse divinam domi, 415  
quia Thebis salvos redierit. PER. Rectam institit.  
AP. Immo ipsus illi dixit conductam esse eam,  
quae hic administraret ad rem divinam tibi.  
[facturum hoc dixit rem esse divinam tibi domi]  
ego illic me autem sic assimilabam: quasi 420  
stolidum, combardum me faciebam. PER. Em istuc decet.  
AP. Res magna amici apud forum agitur, ei volo  
ire advocatus. PER. At quaeso, ubi erit otium,  
revortere ad me extemplo. AP. Continuo hic ero.  
PER. Nihil homini amicost opportuno amicus: 425  
sine tuo labore quod velis actumst tamen.

ego si allegavissem aliquem ad hoc negotium  
minus hominem doctum minusque ad hanc rem callidum,  
os sublitum esset, itaque me albis dentibus  
meus derideret filius meritissimo. 430  
sed quis hic est quem <ego> huc advenientem conspicio, 435  
suam qui undantem chlamydem quassando facit?

### III.iv

MILES Cave praeterbitas ullas aedis, quin roges,  
senex hic ubi habitat Periphanes Platenius.  
incertus tuom cave ad me rettuleris pedem.  
PER. Adulescens, si istunc hominem, quem tu quaeritas, 440  
tibi commonstrasso, ecquam abs te inibo gratiam?  
MIL. Virtute belli armatus promerui, ut mihi  
omnis mortalis agere deceat gratias.  
PER. Non repperisti, adulescens, tranquillum locum,  
ubi tuas virtutes explices, ut postulas. 445  
nam strenuiori deterior si praedicat  
suas pugnas, de illius illae fiunt sordidae.  
sed istum quem quaeris Periphanem Platenium,  
ego sum, si quid vis. MIL. Nempe quem in adolescentia  
memorant apud reges armis, arte duellica 450  
divitias magnas indeptum? PER. Immo si audias  
meas pugnas, fugias manibus dimissis domum.  
MIL. Pol ego magis unum quaero, meas cui praedicem,  
quam illum qui memoret suas mihi. PER. Hic non est locus;  
proin tu alium quaeras cui centones sarcias. 455  
atque haec stultitias me illi vitio vortere 431  
egomet quod factitavi in adolescentia,  
cum militabam: pugnis memorandis meis  
eradicabam hominum auras, quando occeperam.  
MIL. Animum advorte, ut quod ego ad te advenio intellegas. 456  
meam amicam audivi te esse mercatum. PER. Attatae,  
nunc demum scio ego hunc qui sit: quem dudum Epidicus  
mihi praedicavit militem. adulescens, itast  
ut dicis, emi. MIL. Volo te verbis pauculis, 460  
si tibi molestum non est. PER. Non edepol scio,  
molestum necne sit, nisi dicis quid velis.  
MIL. Mi illam ut tramittas, argentum accipias: adest.  
nam quid ego apud te vera parcam proloqui?  
ego illam volo hodie facere libertam meam, 465  
mihi concubina quae sit. PER. Te absolvam brevi:  
argenti quinquaginta mi illa empta est minis;  
si sexaginta mihi denumerantur minae,  
tuas possidebit mulier faxo ferias;  
atque ita profecto, ut eam ex hoc exoneres agro. 470  
MIL. Estne empta mi istis legibus? PER. Habeas licet.  
MIL. Conciliavisti pulchre. PER. Heus, foras educite

quam introduxistis fidicinam. atque etiam fides,  
ei quae accessere, tibi addam dono gratiis.  
age accipe hanc sis. MIL. Quae te intemperiae tenent? 475  
quas tu mihi tenebras trudis? quin tu fidicinam  
produci intus iubes. PER. Haec ergo est fidicina.  
hic alia nullast. MIL. Non mihi nugari potes.  
quin tu huc producis fidicinam Acropolistidem?  
PER. Haec inquamst. MIL. Non haec inquamst. non novisse me 480  
meam rere amicam posse? PER. Hanc, inquam, filius  
meus deperibat fidicinam. MIL. Haec non est ea.  
P. Quid? non est? M. Non est. P. Vnde haec igitur gentiumst?  
equidem hercle argentum pro hac dedi. MIL. Stulte datum  
reor et peccatum largiter. PER. Immo haec east. 485  
nam servom misi, qui illum sectari solet  
meum gnatum: is ipse hanc destinavit fidicinam.  
MIL. Em istic homo te articulatim concidit, senex,  
tuos servos. PER. Quid? concidit? MIL. Sic suspiciost,  
nam pro fidicina haec cerva supposita est tibi. 490  
senex, tibi os est sublitum plane et probe.  
ego illam requiram iam ubi ubi est. PER. Bellator, vale.  
euge, euge, Epidice, frugi es, pugnavisti, homo es,  
qui me emunxisti mucidum, minimi preti.  
mercatus te hodie est de lenone Apoecides? 495  
FIDICINA Fando ego istunc hominem numquam audivi ante hunc diem,  
neque me quidem emere quisquam ulla pecunia  
potuit: plus iam sum libera quinquennium.  
PER. Quid tibi negotist meae domi igitur? FID. Audies.  
conducta veni, ut fidibus cantarem seni, 500  
dum rem divinam faceret. PER. Fateor me omnium  
hominum esse Athenis Atticis minimi preti.  
sed tu novistin fidicinam Acropolistidem?  
F. Tam facile quam me. P. Vbi habitat? F. Postquam liberast  
ubi habitet dicere admodum incerte scio. 505  
PE. Eho an libera illa est? quis eam liberaverit,  
volo scire, si scis. FID. Id quod audivi audies.  
Stratippoclem aiunt Periphanai filium  
absentem curavisse ut fieret libera.  
PER. Perii hercle, si istaec vera sunt; planissime 510  
meum exenteravit Epidicus marsuppium.  
FID. Haec sic audivi. numquid me vis ceterum?  
PER. Malo cruciatu ut pereas atque abeas cito.  
FID. Fides non reddis? PER. Neque fides neque tibias.  
propera igitur fugere hinc, si te di amant. FID. Abiero. 515  
flagitio cum maiore post reddes tamen.  
PER. Quid nunc? qui in tantis positus sum sententiis, ~  
[eamne ego sinam impune? immo etiam si alterum  
tantum perdundumst, perdam potius quam sinam  
me impune irrisum esse, habitum depeculatui] 520  
ei sic data esse verba praesenti palam!

atque me minoris facio prae illo, qui omnium  
legum atque iurum fictor, conditor cluet;  
is etiam sese sapere memorat: malleum  
sapientioremi vidi excusso manubrio. 525

#### ACTVS IV

##### IV.i

PHILIPPA Si quid est homini miseriarum quod miserescat, miser ex animost.

id ego experior, cui multa in unum locum  
confluent, quae meum pectus pulsant simul:

multiplex aerumna me exercitam habet,  
paupertas, pavor territat mentem animi, 530

neque ubi meas spes collocem habeo usquam munitum locum.

ita gnata mea hostiumst potita, neque ea nunc ubi sit scio.

PER. Quis illaec est mulier, timido pectore peregre adueniens  
quae ipsa se miseratur? PHIL. In his dictust locis habitare mihi  
Periphanes. PER. Me nominat haec; credo ego illi hospitio usus venit. 535

PHIL. Pervelim mercedem dare, qui monstret eum mihi hominem aut ubi habitet.

PER. Noscito ego hanc, nam videor nescio ubi mi vidisse prius.  
estne ea an non east quam animus retur meus?

PHIL. Di boni, visitavi \* \* \* antihac?

PER. Certo east \* \* \* quam in Epidauro pauperulam memini comprimere. 540

PHIL. Plane hicine est, qui mihi in Epidauro primus pudicitiam pepulit.

PER. Quae meo compressu peperit filiam quam domi nunc habeo.

quid si adeam -- PHIL. Hau scio an congregiar -- PER. Si haec east. PHIL.

Si is est homo, sicut  
anni multi dubia dant.

PER. Longa dies meum incertat animum. sin east quam incerte autumo, 545  
hanc congregiar astu. 545a

PHIL. Muliebris adhibenda mihi malitia nunc est.

PER. Compellabo. PHIL. Orationis aciem contra conferam.

PER. Salva sis. PHIL. Salutem accipio mi et meis. PER. Quid ceterum?

PHIL. Salvos sis: quod credidisti reddo. PER. Haud accuso fidem.

novin ego te? PHIL. Si ego te novi, animum inducam, ut tu noveris. 550

PER. Vbi te visitavi? PHIL. Inique iniuriu' s. PER. Quid iam? PHIL. Quia

tuae memoriae interpretari me aequom censes. PER. Commode

fabulata es. PH. Mira memoras. <P. Te memini >-- PH. Em istuc rectius.

P. Meministin -- PH. Memini id quod memini. P. At in Epidauro -- PH. Ah, guttula

pectus ardens mi aspersisti. PER. Virgini pauperulae, 555

tuaeque matri me levare paupertatem? PHIL. Tun is es,

qui per voluptatem tuam in me aerumnam obsevisti gravem?

PER. Ego sum. salve. PHIL. Salva sum, quia te esse salvom sentio.

PER. Cedo manum. PHIL. Accipe. aerumnosam et miseriarum compotem

mulierem retines. PER. Quid est quod voltus turbatust tuos? 560

PHIL. Filiam quam ex te suscepi -- PER. Quid eam? PHIL. Eductam perdidisti.

hostium est potita. PER. Habe animum lenem et tranquillum. tace.

domi meae eccam salvam et sanam. nam postquam audivi ilico

ex meo servo, illam esse captam, continuo argentum dedi,

ut emeretur. ille eam rem adeo sobrie et frugaliter 565  
accuravit, ut<ut > ad alias res est impense improbus.  
PHIL. Fac videam, si mea, si salva <mihi sit>. PE. Eho, istinc, Canthara,  
iube Telestidem huc prodire filiam ante aedis meam,  
ut suam videat matrem. PHIL. Remigrat animus nunc demum mihi.

IV.ii

ACROPOLISTIS Quid est, pater, quod me excivisti ante aedis? PER. Vt 570  
matrem tuam

videas, adeas, adveniendi des salutem atque osculum.

ACR. Quam meam matrem? PER. Quae exanimata exsequitur aspectum tuom.

PHIL. Quis istaec est quam tu osculum mihi ferre iubes? PER. Tua filia.

PHIL. Haecine? PER. Haec. PHIL. Egone osculum huic dem? PER. Quor  
non, quae ex te nata sit?

PHIL. Tu homo insanis. PER. Egone? PHIL. Tune. PER. Quor? PHIL. 575

Quia ego hanc quae siet

neque scio neque novi, neque ego hanc oculis vidi ante hunc diem.

PER. Scio quid erres: quia vestitum atque ornatum immutabilem  
habet haec, \* \* \*

PH. \* \* \* aliter catuli longe olent, aliter suis.

ne ego eam novisse \* PER. Pro deum atque hominum fidem, 580

quid? ego lenocinium facio, qui habeam alienos domi

atque argentum egurgitem domo prosus? quid tu, quae patrem

tuom vocas me atque osculare, quid stas stupida? quid taces?

ACR. Quid loquar vis? PER. Haec negat se tuam esse matrem. ACR. Ne fuat,  
si non volt: equidem hac invita tamen ero matris filia; 585

non med istanc cogere aequom est meam esse matrem, si nevolt.

PER. Cur me igitur patrem vocabas? ACR. Tua istaec culpast, non mea.

non patrem ego te nominem, ubi tu tuam me appellas filiam?

hanc quoque etiam, si me appellet filiam, matrem vocem.

negat haec filiam me suam esse: non ergo haec mater mea est. 590

postremo haec mea culpa non est: quae didici dixi omnia;

Epidicus mihi fuit magister. PER. Perii, plaustrum perculi.

ACR. Numquid ego ibi, pater, peccavi? PER. Si hercle te umquam audivero  
me patrem vocare, vitam tuam ego interimam. ACR. Non voco.

ubi voles pater esse, ibi esto; ubi noles, ne fueris pater. 595

PHIL. Quid, <si> ob eam rem hanc emisti, quia tuam gnatam es ratus,

quibus de signis agnoscebas? PER. Nullis. PHIL. Qua re filiam

credidisti nostram? PER. Servos Epidicus dixit mihi.

PHIL. Quid si servo aliter visumst, non poteras novisse, obsecro? ~

PER. Quid ego, qui illam ut primum vidi, numquam vidi postea? 600

PHIL. Perii misera. PER. Ne fle, mulier. intro abi, habe animum bonum;

ego illam reperiam. PHIL. Hinc Athenis civis eam emit Atticus:

adulescentem equidem dicebant emisse. PER. Inveniam, tace.

abi modo intro atque hanc asserva Circam Solis filiam.

ego relictis rebus Epidicum operam quaerendo dabo: 605

si invenio, exitiabilem ego illi faciam hunc ut fiat diem.

ACTVS V

V.i

STRATIPPOCLES Male morigerus mi est danista, qui a me argentum non petit neque illam adducit quae <empta> ex praedast. sed eccum incedit Epidicus. quid illuc est quod illi caperrat frons severitudine?

EPIDICVS Si undecim deos praeter sese secum adducat Iuppiter, 610  
ita non omnes ex cruciatu poterunt eximere Epidicum.

Periphanem emere lora vidi, ibi aderat una Apoecides;  
nunc homines me quaeritare credo. senserunt, sciunt  
sibi data esse verba. STR. Quid agis, mea commoditas? EP. Quod miser.

STR. Quid est tibi? EP. Quin tu mi adornas ad fugam viaticum, 615  
prius quam pereo? nam per urbem duo defloccati senes  
quaeritant me, in manibus gestant copulas secum simul.

STR. Habe bonum animum. EP. Quippe ego quoi libertas in mundo sitast.

STR. Ego te servabo. EP. Edepol me illi melius, si nacti fuant.  
sed quis haec est muliercula et ille gravastellus qui venit? 620

STR. Hic est danista, haec illa est autem, quam emi de praeda. EP. Haecinest?

STR. Haec est. estne ita ut tibi dixi? aspecta et contempla, Epidice:  
usque ab unguiculo ad capillum summumst festivissima.

estne consimilis quasi cum signum pictum pulchre aspexeris?  
EP. Ex tuis verbis meum futurum corium pulchrum praedicas, 625

quem Apella atque Zeuxis duo pingent pigmentis ulmeis.  
STR. Di immortales, sicin iussi ad me ires? pedibus ~ pulmunes  
qui perhibetur prius venisset quam tu advenisti mihi.

DANISTA Haec edepol remorata med est. STR. Siquidem istius gratia  
id remoratu' s quod ist voluit, nimium advenisti cito. 630

DAN. Age age, absolve <me> atque argentum numera, ne comites morer.

ST. Pernumeratumst. DA. Tene cruminam: huc inde. ST. Sapienter venis.  
opperire, dum effero ad te argentum. DAN. Matura. STR. Domist.

EP. Satin ego oculis utilitatem optineo sincere an parum?  
videon ego Telestidem te, Periphanai filiam, 635

ex Philippa matre natam Thebis, Epidauri satam?

TELESTIS Quis tu homo es, qui meum parentum nomen memoras et meum?

EP. Non me nosti? TEL. Quod quidem nunc veniat in mentem mihi.

EP. Non meministi me auream ad te afferre natali die  
lunulam atque anellum aureolum in digitum? TEL. Memini, mi homo. 640  
tune is es? EP. Ego sum, et istic frater, qui te mercatust, tuos.

\* \* \* alia matre, uno patre.

TEL. Quid pater meus? vivit? EP. Animo liquido et tranquillo es, tace.

TEL. Di me ex perdita servatam cupiunt, si vera autumas.

EP. Non habeo ullam occasionem, ut apud te falsa fabuler. 645

STRATIPPOCLES Accipe argentum hoc, danista. hic sunt quadraginta minae.  
siquid erit dubium, immutabo. DAN. Bene fecisti, bene vale.

STR. Nunc enim tu mea es. TEL. Soror quidem edepol, ut tu aequae scias.

salve, frater. STR. Sanan haec est? EP. Sana, si appellat suom.

S. Quid? ego modo <amator sum> huic frater factus, dum intro eo atque exeo? 650

EP. Quod boni est id tacitus taceas tute tecum et gaudeas.

STR. Perdidisti et repperisti me, soror. EP. Stultu's, tace.



tibi quidem quod ames domi praestost, fidicina, opera mea;  
et sororem in libertatem idem opera concilio mea.  
STR. Epidice, fateor -- EP. Abi intro ac iube huic aquam calefieri; 655  
cetera haec posterius faxo scibis, ubi erit otium.  
STR. Sequere hac me, soror. EP. Ego ad vos THESPRIO nem iussero  
huc transire. sed memento, si quid saevibunt senes,  
suppetias mihi cum sorore ferre. STR. Facile istuc erit.  
EP. THESPRIO, exi istac per hortum, adfer domum auxilium mihi, 660  
magnast res. minoris multo facio quam dudum senes.  
remeabo intro, ut accurentur advenientes hospites.  
eadem haec intus edocebo quae ego scio Stratippoclem.  
non fugio, domi adesse certumst; neque ille haud obiciet mihi  
pedibus sese provocatum. abeo intro, nimis longum loquor. 665

V.ii

PERIPHANES Satine illic homo ludibrio nos vetulos decrepitos duos  
habet? APOECIDES Immo edepol tu quidem miserum med habes miseris modis.  
PER. Tace sis, modo sine me hominem apisci. AP. Dico ego tibi iam, ut scias:  
alium tibi te comitem meliust quaerere; ita, dum te sequor,  
lassitudine invaserunt misero in genua flemina. 670  
PER. Quot illic homo hodie me exemplis ludificatust atque te,  
ut illic autem exenteravit mihi opes argentarias!  
AP. Apage illum a me, nam ille quidem Volcani iratist filius:  
quaqua tangit, omne amburit, si astes, aestu calefacit.  
EPIDICVS Duodecim deis plus quam in caelo deorumst immortalium 675  
mihi nunc auxilio adiutores sunt et mecum militant.  
quidquid ego malefeci, auxilia mi et suppetiae sunt domi,  
apolactizo inimicos omnis. PER. Vbi illum quaeram gentium?  
AP. Dum sine me quaeras, quaeras mea causa vel medio in mari.  
EP. Quid me quaeris? quid laboras? quid hunc sollicitas? ecce me. 680  
num te fugi, num ab domo apsum, num oculis concessi tuis?

\* \* \* nec tibi supplico. vincire vis? em, ostendo manus;  
tu habes lora, ego te emere vidi: quid nunc cessas? colliga.  
PER. Ilicet, vadimonium ultro mi hic facit. EP. Quin colligas? 685  
AP. Edepol mancipium scelestum. EP. Te profecto, Apoecides,  
nil moror mihi deprecari. AP. Facile exoras, Epidice.  
EP. Ecquid agis? PER. Tuon arbitrato? EP. Meo hercle vero atque hau tuo  
colligandae haec sunt tibi hodie. PER. At non lubet, non colligo.  
AP. Tragulam in te inicere adornat, nescio quam fabricam facit. 690  
EP. Tibi moram facis, cum ego solutus asto. age, inquam, colliga.  
PER. At mihi magis lubet solutum te rogitare. EP. At nil scies.  
PER. Quid ago? AP. Quid agas? mos geratur. EP. Frugi es tu homo, Apoecides.  
PER. Cedo manus igitur. EP. Morantur nihil. atque arte colliga.  
PER. Nihil moror. EP. Obnoxiose. PER. Facto opere arbitramino. 695  
EP. Bene hoc habet. age nunciam ex me exquire, rogita quod lubet.  
PER. Qua fiducia ausu' s pimum, quae emptast nudiustertius,  
filiam meam dicere esse? EP. Libuit: ea fiducia.

PER. Ain tu? libuit? EP. Aio. vel da pignus, ni ea sit filia.  
 PER. Quam negat novisse mater? EP. Ni ergo matris filia est, 700  
 in meum nummum, in tuom talentum pignus da. PER. Enim istaec captiost.  
 sed quis east mulier? EP. Tui gnati amica, ut omnem <rem> scias.  
 PER. Dedin tibi minas triginta ob filiam? EP. Fateor datas  
 et eo argento illam me emisse amicam fili fidicinam  
 pro tua filia: is te eam ob rem tetigi triginta minis. 705  
 PER. Quo modo me ludos fecisti de illa conducticia  
 fidicina? EP. Factum hercle vero, et recte factum iudico.  
 PER. Quid postremo argento factum est quod dedi? EP. Dicam tibi:  
 neque malo homini neque maligno tuo dedi Stratippocli.  
 PER. Quor dare ausu' s? EP. Qui mi libitum est. PER. Quae haec, 710  
 malum, impudentiast?  
 EP. Etiam inclamitor quasi servos? PER. Cum tu es liber, gaudeo.  
 EP. Merui ut fierem. PER. Tu meruisti? EP. Vise intro: ego faxo scies  
 hoc ita esse. PER. Quid est negoti? EP. Iam ipsa res dicet tibi.  
 abi modo intro. AP. Ei, non illuc temerest. PER. Adserva istum, Apoecides.  
 AP. Quid illuc, Epidice, est negoti? EP. Maxima hercle iniuria 715  
 vinctus asto, cuius haec hodie opera inventast filia.  
 AP. Ain tu te illius invenisse filiam? EP. Inveni, et domi est.  
 sed ut acerbum est, pro bene factis cum mali messim metas.  
 AP. Quamne hodie per urbem uterque sumus defessi quaerere?  
 EP. Ego sum defessus reperire, vos defessi quaerere. 720  
 PER. Quid isti oratis opere tanto? mi <orandum> esse intellego,  
 ut liceat merito huius facere. cedo tu ut exsolvam manus.  
 EP. Ne attigas. PER. Ostende vero. EP. Nolo. PER. Non aequom facis.  
 EP. Numquam hercle hodie, nisi supplicium mihi das, me solvi sinam.  
 PER. Optimum atque aequissimum oras. soccos, tunicam, pallium 725  
 tibi dabo. EP. Quid deinde porro? PER. Libertatem. EP. At postea?  
 novo liberto opus est quod pappet. PER. Dabitur, praebebo cibum.  
 EP. Numquam hercle hodie, nisi me orassis, solves. PER. Oro te, Epidice,  
 mihi ut ignoscas, siquid imprudens culpa peccavi mea.  
 at ob eam rem liber esto. EP. Invitus do hanc veniam tibi, 730  
 nisi necessitate cogar. solve sane, si lubet.

## POETA

Hic is homo est qui libertatem malitia invenit sua.  
 plaudite et valet. lumbos porgite atque exsurgite.